

Date – 28/04/2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Lunglei MZP Headquarters huaihawtin tukin dar 7 atang khan Aizawl-Thenzawl-Lunglei kawngpui dan a ni.
2. African Swine Fever vawk pulhri hri leng avanga kumin chhunga Mizorama vawk thi zat chu 3,000 a chuang tawh.
3. Union Health Minister JP Nadda chuan cancer enkawlna kawngah India chuan nasa takin hma a sawn tih a sawi
4. National Investigation Agency (NIA) chuan ngawrh takin Pahalgam firfiaka chetna an chhui.

<><><>

ATL ROAD STIR

Lunglei MZP Headquarters huaihawta tukin zing dar 7 atang khan Aizawl-Thenzawl-Lunglei kawngpui dan a ni a,.

MZP leh a thlawptute hian Pukpui-ah lirthei lut leh chhuak tur an dang a. MZP te hian ATL Road siamna tur cheng vbc 90 leh nuai 69 chu ATL Road siam na'n hman vek ni se an ti a. He tih lai hian cheng Vbc 45 leh nuai 60 chauh dah niin Mauseh leh Pukpui (km 14) chin chauh siam na'n Sorkar in a dah chu an hriatthiam loh thu leh, pawtpeng lovin a vaiin ATL Road siam na'n hman ni rawh se tiin sorkar an phut a. A bang zawng Aizawl khawpui chhung kawngpui chhe thawmthatna atana hman tura pawhpen ni a sawi chu an duh loh thu an tarlang bawk a ni. MZP te hmalakna hi Lunglei mipui tam ber pawhin an thlawp a, Maxi-Cab Service te pawhin thlawpin Lunglei atanga Aizawl pan ten tlan loh an tum a, Aizawl to Lunglei service te pawhin tlan an tum lo.

Hetianga nih avang hian maxicab ticket pek chhuahnate pawhin vawiina chhuak tur ticket an pe chhuak lo tih an sawi a. Anni bakah hian Lunglei Thalai Pawl, Chhimbial Chhantu, Hnahthial Thalai Pawl, Tlabung to Lunglei-Aizawl-Silchar Maxicab Service te pawhin thlawp in tlan loh an tum thu an puang ni a thu dawn a ni a. Chawngte khua a pawl hrang hrang 11 intelkhawm, Joint NGO's Chawngte te'n ATL Road siamna tur sum pawhpen dahlet a nih theih na'na MZP Hqrs Lungleiin Thawhtanni atanga ATL Road dan chah nise an tih chu, an thlawp tlat tih an puang ve leh bawk.

Sorkar lam atangin leh district bawrhsap pisa lam atang pawhin kawng dan tur hi a hranpa a ti tawp tur a ngenna an dawng lo tih MZP te chuan sawiin a bultan na'n kawng hi dan phawt a ni ang a, a hnu leh zel chu a tul dan angin kalpui a ni ang an ti.

Hetihlai hian PWD hotu thenkhat chuan cheng vaibelchhe 90 leh nuai 69 hi Hmuifang PWD division huamchhung a Contractor Bagharetha Engineering Ltd. te hnathawh that loh vanga an dahkham an chawi leh a pung a ni a, Lunglei ta bik a ni lo an ti a. A nihna takah chuan cheng Vbc 45 leh nuai 60 pawh hi Mausen to Pukpui siam na'n pawhluh zawk a ni an ti.

Heih lai vek hian rorellai ZPM Southern Headquarters, Lunglei chuan ATL Road chungchangah chhim lam mipuite rilru natna chu awm an tih thu leh mipui rilru damna tur thutlukna sorkarin a siamsak hma chuan an party pisa-ah hna engmah thawh rih loh ni se an ti a, party pisa hawn pawh an hreh hle tih an tarlang.

ZPM Southern Headquarters nimina extended elected office bearers thukhawm chuan Aizawl-Thenzawl-Lunglei (ATL) road siamthat hna chu a rang thei ang bera lang thei a hna tan nghal turin sorkar an phut tih an sawi a, tun hnaiah budget pawn lam atanga hun hmasa lama ATL Road kaihnawih sum hmuhlet lehte pawh chief minister in he kawng siamna atana hman a lo remtihsak tawh ang ngeiin chhim mipuite beiseina ang hian ATL road siamna tur hian ruahman sak leh nghal turin sorkar an phut a ni.

Hemi hma April ni 7 khan Lunglei West bialtu MLA leh ZPM Southern Hqtrs-in ATL Road bik enkawl tur a an dah Pu T. Lalhlipua chuan ATL kawngpui hi ZPM Southern Hqrs anga a mawhphurhna a nih angin sorkar hian an siam dawn lo a nih chuan MLA atanga chawlh a hreh loh thu Lunglei leh chhim mipuite'n hriatpui an duh thu an Party chhung inkhawmah a lo sawi tawh a ni.

VC

Kawng dan dawn hian inkhawm hun tawi hman hmasak a ni a, hetah hian MZP hotu te chuan an thil ngiat a hlawhtlin hma loh chuan hmalak zel an tum thu leh tawp mai an tumlo tih an sawi a, an hmalakna thlawptu zawng zawng chungah lawmthusawiin he thil hi Lunglei chauh ni lo, Mizoram chhim lam zawng zawng mipui tan a ni an ti.

ATL Road chungchangah Chief Minister Pu Lalduhoma chuan Vbc 90 ngawr ngawrah ngaituahna sen tur a nih loh thu sawiin Mausen - Kanghmun S chu Central Road Research Institute(CRRI) ten an zirchian a, estimate an siam hnuah, a tul ang zat zat dah an in huam thu a sawi.

Hemi chungchangah hian Lunglei North bialtu MLA Pu V. Malsawmtluanga leh Lunglei South bialtu MLA Pu Lalramliana Papua te chuan nizan khan Chief Minister Pu Lalduhoma chu a chennainah hmuin CM chuan ATL Road chungchangah Vbc 90 ngawr ngawrah ngaituahna sen loh tur a nih thu a sawi a. Pukpui - Mausen siam nan cheng Vbc 45 an dah phawt a, tuna siam tur bak zawng, Mausen - Kanghmun S inkar chu Project siam thiam leh rintlak, Central Road Research Institute ten an zirchian hnuah Estimate an thehltu dawn a, cheng Vbc 100 leh a aia tam thleng ruahman a tul thei nia sawiin a tul zat zat dah belh an in huam thu a sawi a. CRRI te chu karleh lamah an rawn thlen beisei a ni a ti.

<><><>

ASF

African Swine Fever (ASF) vawk pulhri hri leng avanga kumin chhunga Mizorama vawk thi zat chu 3,000 a chuang tawh.

Vety department hotute sawi danin niminah Siaha khawpui chhungah vawk 27 a thi a, vawk 5 suat a ni bawk a. Kumin March ni 20-a Guwahati laboratory-a endikna a Lawngtlai leh Zawlnuam khawpui a vawk damlo leh thi sample endikna a ASF vawk pulhri hmuhchhuah a nih atanga nimin thleng khan a vaiin vawk 3,092 a thi tawh a. Tunah hian Siaha, Lawngtlai, Lunglei khawpui leh Mamit district a Zawlnuam khua a veng 46-te chu ASF vawk pulhri lenna a puan mek a ni.

Tun thlengin ASF avang hian Siaha khawpui a veng 26-ah vawk 1,710 a thi tawh a, Lawngtlai khawpui-in dawtin veng 15-ah vawk 1,193 a thi tawh a, Zawlnuam khua a veng 3-ah 167 thi tawhin Lunglei khawpui-ah 22 a thi tawh bawk a ni.

He tih lai hian ASF pulhri a darh zel tur venna atan vawk 986 suat a ni tawh a. Siaha khawpui-ah 619, Lawngtlai-ah 302, Zawlnuam khua-ah 34 leh Lunglei khawpui a veng 2-ah 22 suat a ni tawh a ni.

<><><>

MOURNING

April ni 21 a thi Catholic kohhran hruaitu lu Pope Francis chu tunkar Nilaini thleng khian Mizorama Catholic kohhran mite pawhin an sun dawn.

Pope Francis hi Catholic kohhran mite chuan Pope thi dang ang bawkin ni kaw chhung an sun dawn tih Aizawl Bishop Most Rev. Stephen Rotluanga'n kal kalta Thawhlehi khan a lo puang tawh a. 'Novemdiales' ti a an vuah, ni kaw chhung Pope Francis sun hun chhung hian an kohhran zirna in leh biak-inah te chuan zirna in puanzar leh Vatican puanzarte chu a ngur chanve a zar tur a ni dawn a. Hemi hun chhung zawng hian Catholic kohhran mite chu nitin Pope kal ta pual hian tawngtaina (rosary) hlan tura beisei an ni. Kum 1936 a piang Pope Francis hi miretheite tana thawk leh a ngaihdan tlang taka sawi thin a nih avanga 'Mipuite Pope' ti hiala sawi thin a ni.

Hetih lai hian Inrinni khan Vatican khawpui a Pope Francis vuina hunah Aizawl Kulikawn a Christ the King Cathedral biak-inah Pope kal ta pual hian hun hman a ni a. Aizawl Bishop Most Rev. Stephen Rotluanga chuan a bik taka ruahman Requiem Mass chu a theh a. He hunah hian beisei an nih angin puithiamte, puithiam hmeichhiate, rawngbawltu leh kohhran mi tam tak pungkhawmin Pope hi an thlah a ni.

Aizawl a awm ve thei lote tan Catholic tualchhung kohhran (parish) hrang hrangah puithiamte chuan sakramen thianghlim hi an buaisaih bawk a ni

<><><>

NO PAKISTANIS

Sorkar laipui-in state hrang hranga Pakistan mi awmte hun tiam chhunga chhuak vek tura a tih lai-in Mizoramah chuan Pakistan mi an awm ve lo ni-in a lang.

Jammu & Kashmir a Pahalgam khua a Pakistan atanga lo lut firfiakte'n April ni 23 a zinmi 26 zet an thah avanga sorkar laipui-in Pakistan passport hmanga India rama la cham zawng zawng hnawhchhuah vek tura a tih avangin state danga Pakistan mi chambangte chu an ramah emaw ram dang remchangah emaw kal tura hnawhchhuah mek an ni a. Mizorama he lam buaipuitu SP, CID (SB) pisa a Foreigners' Registration Office (FRO) a thawkte sawi dan chuan tun dinhmunah Pakistan mi emaw Pakistan passport hmanga rawn zin Mizoramah an awm lo. FRO a thawkte chuan Pakistan leh ram thenkhat atanga Myanmar ramri hne a awm hmarchhak state 2, Manipur leh Nagaland ang bawkin Mizoram a lo lut turte chuan passport leh visa bakah protected area permit (PAP) an neih ngei ngei a ngai tawh a. Chutianga PAP nei, Pakistan atanga Mizorama lo lut leh tuna cham mek an awm an hriat loh thu an sawi a ni.

He tih lai hian intelligence pawl hrang hrangte thurawn angin Jammu & Kashmir a firfiakte chetna rapthlak tak avang hian Mizoram sorkar pawh venhimna lam khauh zawka ruahman tura hriattir a ni a. A bik takin nikum August thla bula an Prime Minister Sheikh Hasina an paihthlak hnu a buaina namen loh chhuah zuina Bangladesh ramri leh Myanmar ramri bakah thenawm Assam leh Tripura atanga firfiak lo lut thei an nih avangin uluk leh zuala venhimna kalpui a ni tawh a. Hei hi chhunzawm zel tura thurawn pek an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

UNION HEALTH MINISTER

Union Health Minister JP Nadda chuan cancer enkawlina kawngah India chuan nasa takin hma a sawn tih a sawi. Nimina Maharashtra-a Chhatrapati Sambhajinagar Government Cancer Hospital-a Cancer institute leh bungraw thar bunna he thu hi sawiin Pu Nadda chuan cancer enkawlina hmun tih changtlun leh cancer hmuhchhuah hma chu an ngai pawimawh tih a sawi a. Pu Nadda chuan The Lancet journal thuziah tarlangin sawrkar hmalakna avangin ramchhunga cancer vei zaa 90 chu hmuhchhuah anih atangin ni 30 chhungin enkawlina tan hman a ni tih a sawi a. Hei hi khawvel huap pawhin a sang ber pawl a nih thu a sawi a. Ramchhungah medical college 780 chuang awmin sawrkar chuan medical education leh healthcare lamah sum a ui dawn lo tih a sawi bawk a ni.

<><><>

NIA

National Investigation Agency (NIA) chuan ngawrh takin Pahalgam firfiaka chetna an chhui. NIA team te hian kar hmasa nilaini atang khan Pahalgam hi an awmchilh tawh a. Firfiakte chetnaah khan mita hmutute thu an zawtfiah zel a. Inbeihna hmun hi luh leh chhuah khap niin firfiakte sulhnu hi uluk taka chhui zui a ni.

Hetihlai hian nimin khan Jammu and Kashmir Police te chuan Budgam district-ah firfiakte nena inkungkaihna nei mi pahnih chu Public Safety Act hnuaiah an man a. An mi man pahnihte hian firfiakte chetna kawngah nasa takin an pui thin nia hriat a ni.

<><><>

MADHYA PRADESH

Madhya Pradesh-a Mandasaur-a lirthei chetsualnaah mi 10 an thi a, mi pali in hliam an tuar. Thudawn danin car chak taka tlan leh motorcycle te chu insuin hemi hnu hian tuichhunchhuahah an tla lut a. Police te chuan a hmun hi thleng nghalin chhanchhuah hna an thawk nghal a ni.

<><><>